

明

會

要

明會要卷五十三

永新龍文彬纂

食貨一

田制

洪武元年正月甲申帝謂中書省臣曰兵革之餘郡縣版籍多亡田賦之制不能無增損今遣周鑄等往浙西覈實田畝定其賦稅無令妄有增擾

昭代典則

三年五月帝以中原地多荒蕪命省臣議計民授田設司農司開置河南臨濠之田驗其丁力計畝給之不得兼并北方近城地多不治召民耕種人給十五畝蔬地二畝免

租三年通典

五年詔流民復業者各就丁力耕種毋以舊田爲限同上

二十年二月戊子命國子生武滔等分行州縣隨糧定區

區設糧長四人量度田畝方圓次以字號悉書主名及田

之丈尺編類爲冊號魚鱗圖冊食貨志

凡典賣田土過割稅糧各州縣年終通行造冊解府毋令

產去稅存大明令

永樂元年發流罪以下墾北京田通典

十年以宛州東昌定陶等縣地廣民稀令青登萊諸郡擇

丁多者分居耕種蠲役三年王圻通考

正統三年詔各處凡有入額納糧田地不堪耕種另白開墾補數者有司勘實不許重起科通典

四年奏准江西浙江福建并直隸蘇松等府凡官民田地有因水塌漲去處令所在有司逐一丈量給與附近小民承種照民田起科塌沒無田者悉與開豁稅糧王圻通考

五年令北直隸府州縣將富豪軍民人等包耕田地除原納糧田地外其餘均撥貧民及衝塌田地人戶耕種照例起科其貧民典當田宅年久無錢取贖及富豪軍民占種逃民田地待復業之日照舊斷還原主

十三年令各處寺觀僧道除洪武年間置買田土其有續

置者悉令各州縣有司查照散還於民若廢弛寺觀遺下田莊令該府州縣踏勘悉撥與招還無業及丁多田少之民每戶男子二十畝三丁以下者三十畝若係官田照依減輕則例每畝改科正糧一石俱爲官田如本戶絕仍撥貧民不許私自典賣

景泰二年令各處寺觀量存六十畝爲業其餘撥與小民

佃種納糧

已上  
通典

天順二年敕皇親公侯伯文武大臣不許強占官民田地起蓋房屋事發坐以重罪其家人及投託者俱發邊衛永遠充軍

又令各處軍民有新開無額田地及願佃種荒閒地土者俱照減輕則例起科

成化六年巡視河南戶部侍郎原傑奏洪武間恩例除常稅荒地許民耕種永不起科景泰間乃剗起科例至今奸民互相告訐徵斂日重請如舊例凡軍民有告訐不起科者不聽

已上王圻考

二十一年令遼東地方軍人有開墾拋荒土田分上中下

三等起科

通典

洪武二十六年覈天下土田總八百五十萬七千六百二十三頃  
宏治十五年天下土田總計四百二十三萬八千

明倫彙編 家範典 第三十三  
五十八頃內官田五十九萬八千四百五十六頃民田三百六十萬九千六百一頃

宏治二年令順天等六府入官田地俱撥與附近無田小民耕種起科每名不過三十畝

嘉靖六年令各處板荒積荒拋荒田地不拘本府別府軍

民匠竈儘力耕墾給與田帖永遠管業

已上  
通典

八年霍韞奉命脩會典言自洪武迄宏治百四十年天下額田已減強半而湖廣河南廣東失額尤多非撥給於王府則欺隱於猾民廣東無藩府非欺隱卽委棄於寇賊矣司國計者可不究心是時桂萼郭宏化唐龍簡霄先後疏

請覈實田畝而顧鼎臣請履畝丈量丈量之議由此起江  
西安福河南裕州首行之而法未詳具人多疑憚其後福  
建諸州縣爲經緯二冊其法頗詳然率以地爲主田多者  
猶得上下其手神宗初建昌知府許孚遠爲歸戶冊則以  
田從人法簡而密矣

食貨志

是年令陝西拋荒田土最多州縣分爲三等第一等召募  
耕種量免稅銀三年第二等許諸人承種三年後方納輕  
糧每石照例減納五年第三等召民自種不徵稅糧

王圻考

十三年題准各處但有拋荒堪種之地聽招流移小民或  
附近軍民耕種照例免稅三年如地主見其耕種成熟復



業爭種者許赴官告明量撥三分之一給主二分仍聽開荒之人承種各照畝納糧十年之上方行均分敢有恃強奪占者官司問罪

通典

十七年詔各處衛所官舍餘丁人等置買民田一體坐派糧差不許抗拒違者奪田入官

隆慶元年巡按御史董堯封奏查出蘇松常鎮四府投詭田一百九十九萬五千四百七十畝花分田三百三十一萬五千六百六十畝因條上便宜八事戶部酌行

已上王圻考

萬曆八年十一月閣臣張居正議天下田畝通行丈量遂用開方法以徑圍乘除畸零截補於是豪猾不得欺隱里

甲免賠累而小民無虛糧總計田七百一萬三千九百七十六頃視孝宗時贏三百萬頃居正頗以溢額爲功有司短縮步弓以求田多或掊克見田以充虛額後遂按溢額增賦

三編

閣臣沈一貫山東營田疏曰該省六府大抵地廣民稀而迤東海上尤多拋荒請令巡撫得自選廉幹官員將該省荒蕪土地逐一查覈頃畝的數多方招致能耕之民如江西福建浙江山西及徽池等處不問遠近凡願入籍者悉許報名擇便官爲之正疆定界署置安插凡拋荒積逋一切蠲貸與之更始或聽和買或聽分種其新籍之民則爲

編戶排年爲里爲甲循阡履畝勸耕勸織毋籍爲兵毋重其課相生相養不出數年可稱天府

農政全書

屯田

明太祖初命諸將於龍江等處屯田惟康茂才所屯田穀一萬五千餘石乃下令褒之因以申諭將士

昭代典則

洪武四年中書省言河南山東北平陝西山西及直隸淮安諸府屯田凡官給牛種者十稅五自備者十稅三詔且勿徵三年後畝收租一斗

食貨志

是年徐達請徙山後民一萬七千餘戶屯北平又以沙漠遺民三萬二千餘戶屯田北平凡置屯二百五十四開田

一千三百四十三頃

通典

六年太僕丞梁額森特穆爾言甯夏四川土膏沃宜招集流亡屯田從之明年命都督僉事王簡往彰德王誠往濟甯平章李伯昇往眞定經理屯務又命鄧愈等諸將分屯陝西河南北平官吏犯罪謫鳳陽屯種民犯流罪者鳳陽輸作一年然後屯種命李善長朱亮祖俞通源撫諭諸屯勸課農事又因海運餉遼有溺死者遂益講屯政天下衛所州縣軍民皆事墾闢其制移民就寬鄉或召募或罪徙者爲民屯領之有司而軍屯則領之衛所邊地三分守城七分耕作內地二分守城八分屯種人授田五十畝給牛

種教樹植復租賦民以不困而軍餉益饒

三編

十九年西平侯沐英鎮雲南奏雲南土地荒蕪宜置屯田以備儲蓄乃諭戶部曰邊地久荒榛莽蔽翳用力實難宜緩其歲輸數年後徵之可也英奉詔自永甯至大理六十里設一堡留軍屯田後景川侯曹震屯田品甸普定侯陳

桓靖甯侯葉昇屯田定邊姚安畢節諸衛

通典

二十一年九月敕天下衛所屯田歲得糧五百餘萬石

三編

二十三年延安侯唐勝宗督貴州各衛屯田

二十五年八月丁卯命馮勝傅友德帥常昇等分行山西

籍民爲軍屯田於大同東勝立十六衛

三十年正月己巳左都督楊文屯田遼東

已上本紀

建文四年令直隸屯田差御史比較各都司屯田巡按御史比較後改增按察使僉事盤查屯田或令各省布按三司提督或令巡按御史提督或令總兵官鎮守提督或差戶部郎中巡屯隨時更改沿革不一

永樂元年命靖安侯王忠往北京整理屯田

二年定屯田官軍賞罰例歲食米十二石外餘六石爲率多者賞鈔缺者罰俸又以田肥瘠不同法宜有別命官軍各種樣田以其歲收之數相考較太原左衛千戶陳淮所種樣田每軍餘糧二十三石帝命重賞之甯夏總兵官何

福積穀尤多賜敕褒美

已上  
通典

仁宗卽位諭戶部尙書夏原吉曰古寓兵於農不奪其時  
民無轉輸之勞而兵食足先帝所立屯種法甚善後來所  
司數以征徭擾之旣失其時遂無其效其令天下衛所凡  
屯田軍士自今不許擅差妨農務違者處重法

大訓  
記

宣德二年正月申明屯田之法令兵部移文所司選老成  
軍官提督屯田仍命風憲官以時巡察

編三

三年四月給事中戴弁奏自山海關至薊州守關軍萬人  
操練外無他差遣若稍屯種亦可實邊請取勘營所附近  
荒田斟酌分給且屯且守實爲兩便上命戶兵二部遣官

與都督陳景先經理

昭代典則

五年工部尙書黃福上言永樂間雖營建北京南討交趾北征沙漠費用未嘗之比國無大費而歲用僅給卽不幸有水旱征調將何以堪請役操備營繕軍士十萬人於濟甯以北衛輝眞定以東緣河屯種初年自食次年人收五石三年收倍之旣省京食口糧六十萬石又省本衛月糧一百二十萬石歲可得二百八十萬石帝善之遣郎中趙新等經理福總其事旣有言軍民各有常業若復分營田役未免勞擾事竟不行

三編

六年二月丁酉命侍郎羅汝敬督陝西屯田四月己酉侍



郎柴車經理山西屯田

本紀

正統元年正月發京軍屯田畿輔

三編

二年免軍田正糧歸倉止徵餘糧六石又免沿邊開田官

軍子粒減各邊屯田子粒有差

世法錄

景泰初學士商輅言邊外田地極廣先因在京功臣等將附近各城堡膏腴之產占作莊田其餘閒田又爲鎮守總兵參將等占爲己業以致軍士無田可耕夫且耕且守如漢趙充國諸葛亮晉羊祜皆有明效今日守邊之策莫要於此下所司議行

同上

宏治十四年秦紘總制三邊見固原迤北延袤千里閒田

數十萬頃請各築屯堡募人屯種每頃歲賦米五石可得

五十萬石下詔行之

編三

宏治間屯糧愈輕有畝止三升者沿及正德時遼東屯田較永樂間田贏萬八千餘頃而糧乃縮四萬餘石初永樂時屯田米常溢三之一常操軍十九萬以屯軍四萬供之而受供者又得自耕邊外軍無月糧以是邊餉恆足及是屯軍多逃死常操軍止八萬皆仰給於倉而邊外數擾棄不耕劉瑾擅政遣官分出丈田責逋希瑾意者僞增田數按括慘毒至遼卒脇眾爲亂撫之乃定

通典

嘉靖時遼東巡撫李承勛招逋逃三千二百人開屯田千

五百頃

本傳

僉都御史劉天和督甘肅屯政請以肅州丁壯及山陝流民於近邊耕牧且推行於諸邊奏當興革者十事田利大

興

本傳

宣大總督翟鵬脩邊牆三百九十餘里得地一萬四千九百餘頃募軍千五百人人給五十畝省倉儲無算

本傳

大同巡撫詹榮以守邊當積粟而近邊宏賜諸堡三十一所延亙五百餘里闢治之皆膏腴田可數十萬頃乃奏請

召軍佃作復租徭帝從之

本傳

給事中管懷理言屯田不興其弊有四疆場戒嚴一也牛

種不給二也丁壯亡徙三也田在敵外四也如是而管屯者猶欲按籍增賦非扣月糧卽按丁賠補耳

食貨志

隆慶二年令宣大開墾田已成業每十頃內給將官五十畝爲養廉之資若副參開種不及百頃守備以下或不及十頃參論戒飭四年令各邊自墾田地照永樂二年事例永不起科如歲增粟十萬五萬石自墾至百頃千頃者重加陞賞

世法錄

萬厯十一年議准陝西延甯二鎮丈出荒田但不在屯田舊額之內者俱聽軍民隨便領種永不起科各邊但有屯餘荒田堪墾者俱照例行

王圻通考

時計屯田之數六十四萬四千餘頃視洪武時虧二十四萬九千餘頃田日減而糧日增其弊如此時則山東巡撫鄭汝璧請開登州海北長山諸島田福建巡撫許孚遠墾閩海檀山田成復請開南日山澎湖又言浙江濱海諸山若陳錢金塘補陀玉環南麂皆可經理

食貨志

天津巡撫汪應蛟疏言天津葛沽一帶咸言斥鹵不可耕臣謂地無水則鹹得水則潤以閩浙治地之法行之未必不可爲稻田今募民墾田五千餘畝內水稻畝收四五石種葛荳者得水灌溉亦畝收二三石惟旱稻以鹺立涸始信閩浙之法可行於北地而斥鹵可變爲膏腴也天津屯

兵四千歲費餉六萬俱斂諸民間今荒土連封蒿萊彌野  
若開渠置堰規以爲田可七千頃頃得穀三百萬石近鎮  
年例可以兼資非獨天津之餉取給也因條畫墾田丁夫  
及稅額多寡以請得旨允行

汪應蛟  
傳通典

崇禎時兵部尙書王治上言祖宗養兵百萬不費朝廷一  
錢屯田是也今遼東永平天津登萊沿海荒地及寶坻香  
河豐潤玉田三河順義諸縣閒田百萬頃元虞集有京東  
水田之議本朝萬厯初總督張佳允巡撫張國彥行之薊  
鎮爲豪右所阻其後巡撫汪應蛟復行之河間今已墾者  
荒未墾者置不問遺天施地生之利而日講生財之術爲

養軍資不大失策乎乞敕諸道監司遵先朝七分防操三分屯墾之制實心力行庶國計有裨軍食無缺帝稱善卽命行之

王洽傳

### 水利田

太祖立國之初以康茂才爲都水營田使論之曰比因喪亂隄防頽圯民廢耕耨故設營田司以脩築隄防專掌水利春作方興慮旱澇不時其分巡各處務在蓄洩得宜毋負付任之意遂詔所在有司民以水利條上者卽陳奏

通典

洪武四年脩復廣西興安縣馬援故所築靈渠三十六陡水可溉田萬頃

農政全書

八年命耿炳文濬涇陽洪渠堰溉涇陽三原醴泉高陵臨潼田二百餘里

二十四年濬定海鄞二縣東錢湖灌田數萬頃

已上河渠志

二十七年諭工部陂塘湖堰可蓄洩以備旱澇者皆因地勢脩治之乃分遣國子生及人才遍詣天下督脩水利凡

開塘堰四萬九百八十七處

明政統宗

三十一年洪渠堰圯命耿炳文脩治之濬渠十萬三千餘

丈

河渠志

永樂元年命夏原吉治蘇松嘉興水患原吉請循禹三江入海故蹟濬吳淞下流上接太湖而度地爲牖以時蓄洩



從之事竣還京師言水雖由故道入海而支流未盡疏洩  
非經久計明年正月原吉復行浚白茆塘劉家河大黃浦  
九月工畢水洩蘇松農田大利夏原吉傳  
二年諭工部安徽蘇松浙江江西湖廣凡湖泊卑下圩岸  
傾頽亟督有司治之

九年麗水民言縣有通濟渠截松陽遂昌諸溪水入焉上  
中下三源流四十八派溉田二千餘頃上源民洩水自利  
下源流絕沙壅渠塞請脩隄堰如舊部議從之

十三年吳江縣丞李昇言蘇松水患大湖爲急宜洩其下  
流若常熟白茆諸港崑山千墩等河長洲十八都港汊吳

縣無錫近湖河道皆宜循其故迹濬而深之仍脩蔡涇等  
牐候潮來往以時啟閉則泛溢可免而民獲耕種之利從  
之

宣德二年浙江歸安知縣華嵩言涇陽洪渠堰溉五縣田  
八千四百餘頃洪武時長興侯耿炳文前後脩濬未久堰  
壞永樂間老人徐齡言於朝遣官脩築會營造不果乞專  
命大臣起軍夫協治從之

三年臨海民言胡巉諸牐瀦水灌田近年牐壞而金黿大  
浦湖涿舉嶼等河遂皆壅阻乞爲開築帝曰水利急務使  
民自訴於朝此守令不得人耳命工部卽敕郡縣秋收起

工仍詔天下凡水利宜興者有司卽舉行毋緩視

已上河渠志

江南巡撫周忱嘗詣松江相視水利見嘉定上海間沿江生茂草多淤流乃濬其上流使崑山顧浦諸所水迅流駛

下壅遂盡滌

周忱傳

四年福清民言光賢里官民田百餘頃隄障海水隄壞已久田盡荒永樂中嘗命脩治迄今未舉民不得耕帝責有司亟治而諭尙書吳中嚴飭郡邑陂池隄堰及時脩濬慢者治以罪

七年脩眉州新津通濟堰堰水出彭山分十六渠溉田二萬五千餘畝

正統四年甯夏巡撫金濂言鎮有五渠資以行漑今明沙

洲七星漢伯石灰三渠久塞請用夫四萬疏濬漑蕪田千

三百餘頃從之

已上河渠志

五年從楊士奇言令天下有司秋成時脩築圩岸疏浚陂

塘具實奏聞俟考滿以此爲殿最

明政統宗

十四年浚和州姥鎮河張家溝井建牖以漑降福等七十

餘圩及南京諸衛屯田時范衷知壽昌縣闢荒田二千六

百餘畝興水利三百四十六渠

通典

景泰四年雲南總兵官沐璘言城東有水南流源發邵甸

會九十九泉爲一抵松花壩分爲二支一繞金馬山麓入

滇池一從黑窯村流至雲澤橋亦入滇池舊於下流築堰  
溉軍民田數十萬頃霖潦無所洩請令受利之家自造石  
牘啟閉以時報可

五年疏靈寶黎園莊渠通鴻瀘澗溉田萬頃

已上河渠志

七年尙書孫原貞言杭州西湖爲勢豪侵占湖水淺狹牘  
石毀壞今民田無灌溉資乞敕有司興濬築禁侵占以便  
軍民從之

天順二年脩彭縣萬工堰灌田千餘頃

五年僉事李觀言涇水出涇陽仲山谷道高陵至櫟陽入  
渭袤二百餘里漢開渠溉田宋元俱設官主之今雖有瓠

口鄭白二渠而隄堰摧決溝洫壅滯民弗蒙利乃命有司

濬之

已上通典

七年巡撫陝西項忠請疏鄭白二渠溉涇陽醴泉三原高

陵臨潼五縣田七萬餘頃

項忠傳

成化十二年巡按御史許進言河西十五衛東起莊浪西抵肅州綿互幾二千里所資水利多奪於勢豪宜設官專理詔屯田僉事兼之

十八年濬雲南東西二溝自松華壩黑龍潭抵西南柳壩南村灌田數萬頃

二十年脩嘉興等六府海田隄岸特遣京堂官往督之上已

河渠

志

宏治七年七月命工部左侍郎徐貫經理蘇湖水利三編  
嘉靖中年呂光洵按吳奏蘇松水利五事廣疏濬以備渚  
洩脩圩岸以固橫流復板牖以防淤塞量緩急以處工費  
重委任以責成功詔如所議

二十六年給事中陳斐請仿江南水田法開江北溝洫以  
祛水患益歲收報可

三十八年尙書楊博請開宣大荒田水利從之已上河渠志

萬厯四年七月壬寅遣御史督脩江浙水利本紀

十三年三月以尙寶司少卿徐貞明督治京畿水田初貞

明爲給事中嘗請興西北水利如南人築圩之制則水利與水患亦除時以財匱不能舉後貞明被謫南行著潞水客談一書論水利當興者十四事兵部尙書譚綸見之謂其議可行於是貞明召還爲尙寶丞會巡撫張國彥等方開水利於薊州永平間有效遂加貞明尙寶司少卿兼監察御史領墾田使令與撫按等官講求疏濬瀦洩之法貞明先詣永平募南人爲倡及明年三月已墾三萬九千餘畝又遍厯諸河周覽水田分合將大行疏濬而閩人勦戚之占田者爭言不便乃罷

三編

三十年保定巡撫汪應蛟言易水可溉金臺滹水可溉恆



山澹水可溉中山湓水可溉襄國漳水來自鄴下西門豹  
嘗用之瀛海當諸河下流視江南澤國不異其他山下之  
泉地中之水所在而有咸得引以溉田請通渠築防量發  
軍夫一準南方水田法行之所部六府可得田數萬頃益  
歲穀千萬石畿民從此饒給無旱澇之患卽不幸漕河有  
梗亦可改折於南取糴於北報可

汪應蛟傳

四十七年御史左光斗出理屯田言北人不知水利一年  
而地荒二年而民徙三年而地與民盡矣今欲使旱不爲  
災澇不爲害惟有興水利一法因條上三因十四議詔悉  
允行水利大興北人始知藝稻

左光斗傳

天啟元年御史左光斗用應蛟策復天津屯田令通判盧觀象管理屯田水利明年巡按御史張慎言言自枝河而西靜海興濟之間萬頃沃壤河之東尙有鹽水沽等處爲膏腴之田惜皆蕪廢今觀象開寇家口以南田三千餘畝溝洫蘆塘之法種植疏濬之方皆具而有法人何憚而不

爲章下所司

河渠志

屯田都御史董應舉疏臣近到天津見汪司農往日開河舊蹟猶存可作水田甚多荒廢不久開之甚易一畝農工止用八錢可得粟三石三斗久荒者畝用農工一兩其挑濬舊河爲力不多止挑濬數尺明年萬石之糧可必也

餘夢

錄

莊田

洪武十年賜勳臣公侯丞相以下莊田多者百頃親王莊田千頃又賜公侯暨武臣公田又賜百官公田以其租入充祿指揮沒於陣者皆賜公田二十四年公侯復歲祿歸

賜田於官

食貨志

洪熙時有仁壽宮莊其後又有清甯未央宮莊

同上

天順二年敕皇親公侯伯文武大臣不許強占官民田地

違者治以重罪

世法錄

憲宗卽位以沒入曹吉祥地爲宮中莊田皇莊之名由此

始其後莊田遍郡縣給事中齊莊言天子以四海爲家何必置莊田與民爭利弗聽

食貨志

成化四年禁勦戚請民田已而慶雲伯周壽求涿州田壽弟長甯伯或求武強武邑田六百餘頃皆予之明年或又欲於其外籍民田帝遣官往視皆民所墾闢輸賦者因據籍步之每畝百步餘沒入爲閒田得七十餘頃或不滿復言於帝改命郎中彭韶御史季琮覆視韶琮往不復步田周視徑歸上疏自劾曰眞定田自祖宗時許民墾種卽爲恆產除租賦以勸力農功臣戚里家與國咸休豈當與民爭尺寸地臣誠不忍奪小民衣食附益貴戚請伏奉使無

狀罪疏入詔以田歸民

三編

宏治初戶部尙書李敏言今畿輔皇莊五爲地萬二千八百餘頃勦戚中官莊三百三十有二爲地三萬三千一百餘頃請盡革莊戶賦民耕畝概徵銀三分充各宮用度無皇莊之名而有足用之實時不能用

李敏傳

二年因御史言罷仁壽宮莊還之草場

食貨志

三年禁宗室勦戚奏請田土若軍民人等妄自投獻者發

邊衛充軍

世法錄

十一年何孟春奏言皇莊之始先朝畿內空間之地籍之公家佃民耕種而收其入其地廣狹有定界其入有定額

非以病於民也近年看莊人役罔恤國體近莊田土小民  
衣食之資橫加侵占求益不已非九重厚民之意也昔漢  
宣帝詔池籩未御幸者假與貧民流民還歸者假公田種  
食今縱不能以假貧民忍於民衣食租賦所出者而奪之  
乎伏乞陛下敕官往勘皇莊地面從實丈量造冊繳部歲  
收其入以備經費若遇水旱與民田一例開除既不失本  
莊之賦亦不病近莊之民畿甸之內庶無侵奪之害疏入  
帝從之

明臣  
奏議

武宗卽位踰月建皇莊七其後增至三百餘處諸王外戚  
求請奪民田者無算

食貨  
志

世宗初命夏言樊繼祖張希尹等往順天府查勘莊田地  
土共二十萬九百一十九頃又外係先年侵占民者共二  
萬二百二十九頃請各給其主而宦戚輩復中撓之通典

嘉靖二年九月丙子復命戶部清覈畿輔莊田尙書孫交  
上各宮莊田數視舊籍不同帝詰其故交言舊數多者以  
奏乞投獻數多妄報也新數少者以奉命清覈田多除豁  
也帝命查成化宏治間原數以聞春明夢餘錄

六年戶部侍郎王軌清勦戚莊田言宜量等級爲限尙書  
梁材奏成周班祿有土田祿由田出非常祿外復有土田  
今勦戚祿已踰分而陳乞動千萬請申禁之自特賜外量

存三之一以供祀事帝命並清已賜者額外侵據悉還之

民

梁村傳

時中旨各宮仍置皇莊遣官校分督戶部侍郎秦金言西漢盛時以苑囿賦貧民今奈何剝民以益上乞勘正德間額外侵占者悉歸其主而盡撤管莊之人帝從其議秦金傳

三十九年遣御史沈陽奪隱冒莊田萬六千餘頃

食貨志

隆慶時御史王廷瞻言勦戚莊田太濫請於初給時裁量

田數限其世次爵絕歸官制可

王廷瞻傳

二年復定世次遞減之數勦臣五世限田二百頃戚晚七

百頃至七十頃有差

食貨志



神宗賚予過侈福王分封括河南山東湖廣田爲王莊至四萬頃羣臣力爭乃減其半熹宗時桂惠瑞三王及遂平甯國兩公主莊田動以萬計蓋中葉以後莊田侵奪民業與明相終云同上

### 勸農桑

洪武元年楊思義爲戶部尙書以農桑積儲爲急請令民間皆植桑麻四年始徵其稅不種桑者輸絹不種麻者輸布如周官里布法詔可思義傳

五年十二月敕中書令有司今後考課必書農桑學校之

績憲章錄

八年八月己亥敕李善長等勸督農事

大政記

十四年上加意重本抑末下令農民之家許穿紬紗絹布商賈之家止許穿布農民之家但有一人爲商賈者亦不

許穿紬紗

農政全書

十八年九月諭戶部曰人皆言農桑衣食之本然業本必先於黜末自什一之塗開奇巧之技作於是一農執耒而百家待食一女躬織而百夫待衣欲民之母貧得乎朕思足食在於禁末作足衣在於禁華靡宜令天下四民各守其業不許游食庶民之家不許衣錦繡

大訓記

二十五年令鳳陽滁州廬州和州每戶種桑二百株棗二

百株柿二百株

世法錄

二十七年三月庚戌課民樹桑棗木棉

本紀

二十九年五月給桑種於湖廣諸郡

明政統宗

西平侯沐英在滇簡守令課農桑

沐英傳

三十一年正月乙丑上以山東河南多惰於農事詔戶部

遣所舉人才分詣各郡縣督民耕種具籍所種田地與歲

收穀粟之數以聞

明政統宗

永樂元年命寶源局鑄農器給山東諸被兵處徵耕牛於  
朝鮮分給遼東諸屯士謂戶部曰近因兵戈蝗旱民流徙  
廢業不及今勸相使盡力南畝將不免有失所者其遣人

督勸毋忽

農政全書

二年諭戶部曰今春時和東作方興宜申明教術勸課農

桑

授時通考

四年六月諭廣東布政司自今番夷入貢如值農務之時其方物並於南雄收儲俟十一月農隙令運赴南安著爲

令

世法錄

十一年九月壬午詔郡縣官每歲春初行視境內蝗蝻害

稼卽捕絕之不如詔者並罪其布按二司

本紀

宣德二年四月設江南勸農官

大政記

四年九月申明栽種桑棗之令

同上

五年三月帝奉太后謁陵歸見道中耕者取耒三推顧侍臣曰朕三推已不勝勞况吾民終歲勤動乎命賜所過農

民鈔

本紀

四月命侍郎成均督江南農務

大政記

六年二月改江南治農官爲催糧官其正官仍督農務

同上

七年命揭幽風圖於殿壁嘗夏日午朝退咏聶夷中鋤禾

日當午句謂侍臣曰吾每誦此未嘗不念農人帝又嘗以

所賦織婦詞示侍臣以見蠶事之勞苦

三編

十年十一月令都布二司嚴督所司種桑棗

大政記

英宗初山西參政王來言郡縣官不以農桑爲務致民多

游惰田日荒閒租稅無出累及良民宜擇守長賢者以課農爲職其荒田令附近之家通力合作供租之外聽其均分原主復業則還之蠶桑可裨本業者聽其規畫仍令提學風憲官督之庶人知務本從之

王來傳

正統九年七月申明種桑棗法

大政記

張需爲霸州知州見州民游食者眾每里置簿列男女大小口數計其耕桑樹畜爲設方略暇復躬自巡視分別勸懲於是民皆勤力州以饒富

三編

景泰二年二月癸巳詔畿內及山東巡撫官舉廉能吏專

司勸農授民荒田貸牛種

本紀

四年十月庚寅詔天下鎮守巡撫官督課農桑同上

成化時姜洪除盧氏知縣單騎勸農桑本傳

九年七月復設江南勸農官大政記十一月添設各府州縣

判丞官專司勸農明政統宗

十年五月增順天永平府州縣勸農官十月增山東勸農

參政一員大政記

正德時泰和知縣陸震親行鄉落勸課農桑本傳

泗州知州汪應軫因土瘠民貧不知農桑應軫勸之耕買

桑植之募江南女工教以繅蠶織作由是民足衣食本傳

嘉靖時台州知府羅僑歲時循行阡陌課農桑本傳

六年諭令各該巡撫所屬官帶農田銜者不許營別差務督令舉職循行勸課其原未設官者委佐貳主之歲嚴課其殿最

農政全書

萬厯十年四月戊子朔諭禮部令民及時農桑勿事游惰

本紀

陳幼學爲確山知縣墾萊田八百餘頃給貧民牛五百餘頭里婦不能紡者授紡車八百餘輛栽桑榆諸樹三萬八千餘株調繁中牟給貧民牛種貧婦紡具倍於確山

循吏本傳



明會要卷五十三終

明會要卷五十四

永新龍文彬

食貨二

田賦

明初定官民田賦凡官田畝稅五升三合五勺民田三升三合五勺重租田八升五合五勺沒官田一斗二升蘆地五合三勺草塌地三合一勺

世法錄

洪武元年正月詔遣周鑄等一百六十四人往浙西定稅額時處州之糧以軍加徵至十倍章溢屢以爲言至是請定處州七縣稅糧視宋制畝加五合餘悉除之

通紀

九年天下稅糧令民以銀鈔錢絹代輸其後以米麥爲本色諸折納稅糧者謂之折色

食貨志

十三年三月減蘇松嘉湖糧額初帝平吳怒四府爲張士誠守乃籍諸豪族及富民田以爲官田按私租簿爲稅額楊憲爲司農卿又以地膏腴增其賦畝加二倍視他方倍徙洪武七年詔減四府極重田租之半然重者猶徵至七斗以上至是復命戶部裁其額畝科七斗五升至四斗四升者減十之二四斗三升至三斗六升者概徵三斗五升以下仍舊

編三

十四年正月定賦役籍詔天下編造黃冊冊有丁有田丁

有役田有租租曰夏稅曰秋糧夏稅無過八月秋糧無過

明年二月

食貨志

御史解縉太平十策言天下稅糧當一切盡徵本色除漕  
運京倉之外其餘則儲之於通都大邑而使司計之臣略  
仿劉晏之遺意量其歲之豐凶稽其價之高下糶銀解京  
以資國用一年計之不足十年計之有餘小民免稱貸之  
苦官府省敲扑之煩郡國有凶荒之備一舉而三善隨之  
矣

臣知錄

建文二年正月詔減江浙田賦畝不得過一斗有司違者  
罪之後永樂中盡革建文政浙西賦復重

三編

永樂元年湖廣夏稅至後期戶部尙書郁新請治府州縣  
官稽緩罪帝曰賦入但無失經制可矣耕種有先後地里  
有遠近何能概論任官牧民當察其難易而悉其情苟以  
稽緩罪其官必急責於民吾民殘矣其勿問

春明夢  
餘錄

三年令凡開墾官湖作官田每畝夏稅麥二升秋糧米三

斗

世法  
錄

宣德四年令推陞之郎中員外御史長史等六員爲各部  
侍郎分往浙江江南湖廣河南山東山西等布政司並南  
北直隸府州縣督收稅糧

通  
典

又詔各處官田每畝舊納糧一斗至四斗者各減十之二

四斗一升至一石以上者減十之三

王圻通考

正統元年令浙江直隸松蘇等處官田准民田起科每畝四斗一升至二石以上者減作三斗二斗一升以上至四斗者減作二斗一斗一升至二斗者減作一斗

同上

副都御史周銓言行在各官俸支米南京道遠費多所餘無幾請於直省不通舟楫之州縣折收布絹白金解京充俸江西巡撫趙新尙書黃福亦以爲言帝問尙書胡濙濙言太祖時嘗折納稅糧於陝西浙江民以爲便遂倣其制米麥一石折銀二錢五分南畿浙江江西湖廣福建廣東廣西米麥共四百餘萬石折銀百萬餘兩入內承運庫謂

之金花銀其後概行於天下自起運兌運外糧四石折銀一兩解京以爲永例由是諸方賦入折銀者幾半而倉廩之積漸少矣

世法錄

天順時令鎮守浙江尙書孫原貞等定杭嘉湖則例以起科重者徵米宜少起科輕者徵米宜多凡重者輕之輕者重之欲使科則適均而畝科一石之稅未嘗減云

食貨志

成化八年二月謀撥河套兵部尙書白圭建豫徵之議檄下山西河南諸府縣內地騷然兵科給事中梁璟以爲言侍講倪岳亦言山西河南之民飛芻挽粟徒步千里夫運而妻供父輓而子荷乃轉輸不足又有豫徵水旱不可先

知豐歉未能逆卜徵如何其可豫也俱不省

三編

嘉靖二年御史黎貫疏言國初夏秋二稅麥四百七十一萬石今少九萬米二千四百七十餘萬石今少二百五十餘萬而宗室之蕃官吏之冗內官之眾軍士之增悉取給其中賦入則日損支費則日加請覈祖宗賦額及經費多寡之數一一區畫於是戶部議令天下官吏考滿遷秩必嚴覈任內租稅徵解足數方許給由交代帝納之

食貨志

三年應天巡撫歐陽鐸以蘇松田不甚相懸下者畝五升上者至二十倍乃令賦最重者減耗米派輕齎最輕者徵本色增耗米陰輕重之賦乃均

歐陽鐸傳



諭德顧鼎臣條上錢糧積弊四事一曰察理田糧舊額請  
責州縣官於農隙時令里甲等仿洪武正統間魚鱗風旗  
之式編造圖冊細列原額田糧字圩則號條段坵荒成熟  
步口數目官爲覆勘分別界址履畝檢塌丈量具開墾改  
正豁除之數刊刻成書收貯官庫給散里中永爲稽考一  
曰催徵歲辦錢糧成宏以前里甲催徵糧戶上納糧長收  
解州縣監收糧長不敢多收斛面糧戶不敢攬雜水穀糠  
粃兌糧官軍不敢阻難多索公私兩便近者有司不復比  
較經催里甲負糧人戶但立限敲扑糧長令下鄉追徵豪  
强者則大斛倍收多方索取孱弱者爲勢豪所凌不免變

產補納至或舊役侵欠責償新僉且往時每區糧長不過正副二名近多至十人以上其實收掌管糧之數少而科斂打點使用年例之數多州縣一年之間輒破中人百家之產害莫大焉宜令戶部議定事例轉行所司審編糧長務遵舊規其二則議遣官總理及復豫備倉糧也議雖切中時弊有司遷延不行

時又有網銀一串鈴諸法網銀者舉民間應役歲費丁四糧六總徵之易知而不繁猶網之有網也一串鈴則夥收分解法也

已上食貨志

御史龐尙鵬巡按浙江奏請行一條鞭法其法總括一州

縣之賦役量地計丁丁糧畢輸於官一歲之役官爲僉募  
力差則計其工食之費量爲增減銀差則計其交納之費  
加以贈耗以及土貢方物悉併爲一條皆計畝徵銀折辦  
於官故謂之一條鞭立法頗爲簡便嘉靖間數行數止萬  
厯時張居正當國請下制申飭海內通行

春明夢  
餘錄

隆慶元年四月戶部尙書葛守禮言國初徵糧戶部定倉  
庫名目及石數價值通行所司分派小民隨倉上納完欠  
之數瞭然可指近乃定爲一條鞭法計畝徵銀不問倉口  
不論石數吏書黃緣爲奸灑派增減弊端百出至於收解  
乃又變爲一串鈴法謂之夥收分解收者不解解者不收

收者獲積餘之貲解者任賠補之累夫錢穀必分數明而後稽覈審今混而爲一是爲那移者地也願敕所司酌復舊規詔悉舉行於是奏定國計簿式頒行天下自嘉靖三十六年以後完欠起解追徵之數及貧民不能輸納備錄簿中自府州縣達布政送戶部稽考以清隱漏那稽侵欺

之弊

葛守禮傳

四年巡撫保定朱大器條陳田賦五弊一責全徵一革截解一清存留一嚴侵冒一除兌支

王圻考

萬厯時給事中蕭彥上言察吏之道不宜視催科爲殿最昨隆慶五年詔徵賦不及八分者停有司俸至萬厯四年

則又以九分爲及格仍令帶徵宿負二分是民歲輸十分  
以上也有司憚考成必重以敲扑民力不勝則流亡隨之  
臣以爲九分與帶徵二議不宜並行所謂寬一分民受一  
分之賜也部議允行蕭彥傳

賜田租

吳元年正月戊戌賜太平田租二年應天鎮江甯國廣德  
田租各一年本紀

洪武元年四月以山東州郡新附詔免今年夏稅秋糧通紀  
二年正月庚戌詔以海內戡定民尙未甦免山東北平燕  
南河東山西今年夏稅秋糧其北京河南除徐宿等州已

免外西抵潼關北界大河南至唐鄧光息一體蠲免

又詔免應天鎮江太平宣城廣德及無爲州田租

三年三月庚寅詔曰成武功者必資民力各郡邑供給有先後豐歉有不同凋弊之餘未能蘇息其蠲應天鎮江徽州甯國池州太平廬州廣信饒州金華嚴州衢州處州廣德滁和十六府州及河南山東北平今年田租又免徐邳二州夏稅

五年十月免應天太平鎮江甯國廣德田租

已上三編

九年三月己卯詔曰比年西征燉煌北伐沙漠軍需甲仗皆資山陝又以秦晉二府宮殿之役重困吾民平定以來

閭閻未息國都始建土木屢興畿輔既極煩勞外郡疲於  
轉運今蓄儲有餘其淮揚安徽池五府及山西陝西河南  
福建江西浙江北平湖廣今年租賦悉免之

十三年五月己亥詔免天下田租

十四年十月甲寅免應天太平廣德鎮江甯國田租

十五年四月壬辰免畿內浙江江西河南山東稅糧

已上本紀

十六年五月免應天太平鎮江甯國廣德田租詔曰五郡

爲興王之地其民助朕居多故數免稅以酬其勞

明政統宗

十七年七月丁巳免畿內今年田租之半

十八年三月免畿內今年田租

已上本紀

二十八年九月以山東民供給遼東山西北平軍需詔蠲

其租又免應天等五府秋糧

三編

惠帝卽位賜天下明年田租之半

本紀

建文四年成祖卽位十二月癸丑蠲被兵州縣明年夏稅

同上

永樂三年正月庚申免順天永平保定田租二年以數年

用兵供給特勞故休息之

三編

十二年八月丙午蠲北京州縣田租二年

宣德元年十二月辛酉免六師所過秋糧

七年三月辛酉諭禮部曰朕以官田賦重十減其三乃聞



異時蠲租詔下戶部皆不行甚者戒約有司不得以詔書爲辭是廢格詔令使澤不下究也自今令在必行毋有所遏

景帝卽位免景泰二年田租十之三

憲宗卽位免明年田租三之一

世宗卽位賜天下明年田租之半

嘉靖十五年三月如天壽山謁陵免昌平今年稅糧三之二

十八年三月帝幸承天免湖廣明年田賦五之二畿內河南三之一

穆宗卽位免明年天下田賦之半

萬厯八年三月謁陵天壽山免所過田租

已上本紀

### 蠲逋賦

惠帝卽位詔行寬政蠲逋賦

永樂六年二月丁未除北京永樂五年以前逋賦三月乙卯除河南山東山西永樂五年以前逋賦

九年十一月戊午蠲陝西逋賦

十年二月辛酉蠲山西河南逋賦

十四年正月己酉免北京河南山東永樂十二年逋租

十九年四月乙巳蠲十七年以前逋賦

已上本紀

宣德元年二月悉除開荒田逋稅

三編

七年四月免山西逋賦二百四十萬石有奇

同上

正統三年九月癸巳蠲兩畿湖廣逋賦

五年四月壬申免山西逋賦九月壬寅蠲雲南逋賦

十年二月己未免陝西逋賦

景泰元年三月癸亥免畿內逋賦及夏稅十月癸巳免畿內逋賦

七年蠲畿內山東逋賦

武宗卽位除宏治十六年以前逋賦

正德五年三月免正德三年逋賦

世宗卽位免正德十五年以前逋賦

穆宗卽位免嘉靖四十三年以前逋賦

隆慶六年五月壬辰免廣東用兵諸郡逋賦

萬厯六年四月乙未免湖廣四川逋賦

七年三月甲子免淮揚逋賦

已上本紀

十年正月本紀系之免天下逋賦張居正言百姓財力有

二月丁酉

限卽年歲豐收一歲之入僅足供一歲不幸荒歉目前尙

不能辦豈能更完逋賦有司移新抵舊年分混雜甚至不

肖者因而混獵與其賸民以實奸貪之橐孰若盡蠲以施

曠蕩之恩帝從之凡免一百餘萬有奇

三編

十二年六月辛亥以雲南用兵免稅糧及逋賦

二十年七月癸酉免陝西逋賦

二十九年正月壬子以播州平蠲四川貴州湖廣雲南加派田租逋賦

崇禎九年五月癸酉免畿內五年以前逋賦十一月丁未蠲山東五年以前逋賦

十五年正月戊子免天下十二年以前逋賦

已上本紀

### 荒政

洪武元年八月詔曰今歲水旱各處所在官司不拘時限

從實踏勘實災蠲免租稅

農政全書

三年正月西安鳳翔二府饑戶部奏請運粟濟之帝曰民旦暮待哺若待運粟死者多矣卽命戶部主事李亨馳驛往振之戶給粟一石

五年四月山東行省言濟南萊州連年旱澇傷禾麥民食草實樹皮帝卽命於淮安運粟振之

六年饒陽知縣郭楨見邑中大饑民食草實木皮遂以上聞帝覽其奏復咨訪得晉冀等州皆饑乃命尙書劉仁等往各州縣振之蠲其租賦

已上世法錄

費震擢漢中知府歲凶盜起發倉粟十餘萬斛貸民俾秋成還倉盜聞皆來歸令占宅自爲保伍得數千家

楊思義傳

二十六年四月諭戶部曰歲荒民饑必待奏請道途往返動經數月民之饑死者多矣自今遇歲饑先貸後聞著爲令

永樂元年十二月乙酉尙書郭資等奏眞定棗強民饑乞遣人覈實振濟上曰民困如此濟之當如救焚拯溺少緩卽無及矣今遣人覈實展轉往復民命迫於旦夕其可待乎命戶部速遣官振之

三年三月丙午淮安邳州言饑民計其口數請得粟九千石振之上曰此可給三月耳秋成之期尙遠恐不免於餓死國家惠民豈可爲旦夕計宜倍其數給之

已上世法錄

五年五月辛未諭都察院曰河南郡縣薦罹旱澇有司匿不以聞有言雨暘時若禾稼茂實者及遣人視之民所收十不及四五或十不及一至掇草實爲食聞之惻然亟發粟振之已有饑死者此朕任用匪人之過已悉置於法其榜諭天下有司凡災傷不以聞者罪之不宥

大訓記

七年江淮饑命都御史虞謙給事中杜欽巡視啟請振貸皇太子諭之曰軍民嗷嗷待哺尙從容啟請待報獨不聞汲黯事耶亟發廩振之毋緩

通紀

九年七月戶部言振北京臨城縣飢民三百餘戶給糧三千七百石有奇上曰國家儲蓄上以供國下以濟民故豐



年則斂凶年則散今後但遇水旱民饑卽開倉振給無令

失所

農政全書

十六年七月己巳敕責陝西諸司比聞所屬歲屢不登致民流莩有司坐視不恤又不以聞其咎安在其速發倉儲振之稽遲者必誅不宥

十八年青萊二府大饑皇太子過鄒縣命亟發官粟以振至京以聞帝是之曰昔范仲淹子猶能舉麥舟濟其父之故舊况百姓吾赤子乎

十九年二月振河南饑復遣御史蔡新等檢察振濟不及者三千一百戶補給之典賣男女者官爲收贖

二十年戶部奏直隸開州諸處民饑帝嘆曰有司必至饑民嗷嗷始達於朝又待命下始振之餒死者已不逮矣其令自後遇災先振後聞

已上世法錄

洪熙元年四月壬寅帝聞山東及淮徐民乏食有司徵夏稅方急乃御西角門召大學士楊士奇草詔免今年夏稅及秋糧之半士奇言上恩至矣但須戶工二部預聞帝曰有司慮國用不足必持不決救民之困當如救焚拯溺不可遲也趣命中官具楮筆令士奇就門樓書詔帝覽畢卽用璽付外行之顧士奇曰今可語部臣矣

正統五年七月辛丑遣刑部侍郎何文淵等分行天下脩

備荒之政

已上本紀

十年七月巡撫于謙言山陝饑民二十餘萬皆就食於河南訪得懷慶河南二府倉糧見存六十餘萬石乞減價糶與饑民收鈔解京上諭戶部曰此古名臣救荒良策也其諭謙速行之典

景泰四年三月鳳陽淮安徐州大水道殣相望王竑巡撫江北奏聞不待報開倉振之山東河南饑民就食者至竑以徐州廣運倉有餘積欲盡發之典守中官不可竑曰民旦夕且爲盜若不吾從脫有變當先斬若然後自請死耳中官憚竑威名不得已從之竑乃自劾專擅罪因言廣

運所儲僅支三月請令死罪以下得於被災所入粟自贖  
帝復命侍郎鄒幹齎帑金馳赴聽便宜竝乃躬自巡行散  
振不足則令沿淮上下商舟量大小出米全活百八十五  
萬餘人勸富民出米二十五萬餘石給饑民五十五萬七  
千家賦牛種七萬四千餘復業者五千五百家他境流移  
安輯者萬六百餘家

王竝傳

五年正月甲戌命平江侯陳豫學士江淵撫輯山東河南  
被災軍民三月辛酉學士江淵振淮北饑民王文撫卹南

畿

本紀

天順元年命侍郎周瑄振北畿僉都御史林聰振山東帝

恐暄聽巡歷不能周遍復遣侍郎黃仕儁繼往聽屢請發帑帝詔徐有貞李賢議有貞曰發帑振濟徒爲里胥乾沒耳賢曰慮乾沒而不貸坐視民困是因噎廢食也帝卒從

賢議

三編

成化六年山東河南旱給事中邱宏請振因言四方告災部臣拘成例必覈實始免上雖蠲租下鮮實惠請自今遇災撫按官勘實卽與蠲除從之

邱宏傳

九年牟俸巡撫山東歲祲請發濟南倉儲減價以糶令臨清關稅收米麥助振又以民多轉徙請敕鄰境撫按官隨所在安輯秋成資遣復業且乞開中淮浙鹽百萬引盡蠲

州縣逋課詔如所請更命移臨清倉粟十萬石以振俸尋  
乞截留漕糧并貸饑民布棉免柴夫折價銀移河南輪邊  
粟濟山東而別給銀爲邊餉山東輸京租二十萬石給本  
地用帝皆嘉納明年又饑請發倉儲出貨俸撫山東五年  
盡心荒政活饑民不可勝數

年俸傳

十八年淮揚巡撫張瓚以鳳陽淮安饑入告發兩淮鹽直  
五萬振之南京給事中劉璣復告南直隸諸府州災命以  
淮安常盈倉糧三萬石振鳳陽以蘇松常鎮四府歲儲餘  
米徐州廣運倉糧一萬石各振其地之民以南京常平倉  
糧三萬石振應天滁州以揚州鈔關及稅課司夏季應徵

之鈔準貫納米振淮安揚州敕瓚與蘇松巡撫王恕董其事  
三編

二十一年詔曰往者災沴迭興天時亢旱歲竟不登河南  
山東畿內率多饑饉陝西山西尤劇至有棄恆產家室不  
顧者元元何辜罹此危阨博採羣議發內帑倉儲敕所司  
多方振濟期此矜人咸歸樂土  
同上

二十二年王恕奏邇來禮部因陝西山西山東河南北直  
隸災傷請令僧道關給度牒就彼納米給振又聞湖廣鎮  
守太監韋貴奏稱饑民南流日有萬口請敕巡撫將新舊  
流民招撫復業又聞大學士萬安等奏令生員納米准監

民人等納米准投軍職俱赴災處上納給振有以見皇上  
憂民恤患之心無所不至臣惟陝西山西地方連年災傷  
米價騰貴小民貧難多殷實少雖奉上項恩例恐願納者  
寡焉能濟眾臣思流民缺食無計聊生拊循失策必爲盜  
賊勞師動眾所費益多合無將湖廣今年該起運南京各  
倉及兌軍秋糧量留一二十萬石並河南該兌軍秋糧量  
留一二十萬石俱赴荆襄水次倉振濟流民不令失所臣  
深慮各項納米急不能待有誤賑貸合無先出內帑銀二  
三十萬兩速發振濟仍乞將被災府縣今年稅銀買辦等  
項盡行蠲免帝從之

明臣奏議



明倫彙編 家範典 三十四  
宏治三年二月以河南當河決後民困未甦特詔蠲其秋糧越三日戶部以鳳陽淮揚鄖襄南陽諸郡水旱請免徵芻糧及麥絲之稅帝曰凶歲當損上益下必欲取盈如民病何部臣言甚稱朕旨亟如所請行

五年餘杭致仕尙書鄒幹疏言浙江水旱相仍民窮且盜乞急行蠲恤於是命侍郎吳厚巡視浙江督有司振濟時給事中吳世忠請振災無俟勘覆略云近者南畿及山東諸行省各以災告而浙江爲甚致塵宸衷屢飭百司經畫乃振恤之典有加而惠澤之實未究良由府縣官吏發粟不時文書勘報動淹旬月俟旣得食而饑者已死流者已

遠又况書吏胥役因緣爲奸更有不可勝言者今欲約之以法莫若稽諸冊籍以產之多寡驗民之窮富凡遇給振視此爲則富者不得濫支貧者獲沾實惠庶弊革而惠行因條上興水利復常平倉二事詔舉行之

六年閏五月以水災蠲瀋陽諸衛屯糧六萬四千餘石順天州縣夏稅萬五千餘石及河間保定山西太原諸府平陽諸縣夏稅河南開封諸府夏稅之半祥符諸縣秋糧而蘇松與山東仍皆饑從應天巡撫佾鍾請留蘇松常湖四府漕糧三十萬石畀鍾分振山東巡撫王霽先後請發帑金五十餘萬米二百餘萬石選廉能吏驗口給之活饑民二

百六十餘萬

八年四月振應天浙江饑凡給穀米五十六萬三千餘石  
帑金三千九百五十餘兩所活饑民百二十萬有奇

已上三編

十四年十一月癸巳分遣侍郎何鑑大理寺丞吳一貫振

卹兩畿山東河南饑民

本紀

正德十三年正月給事中邵錫言自去年雨水爲災順天  
保定河間被害尤甚眞定大名等五府次之陛下軫念災  
傷旣發戶部及德州倉糧遣郎中二人振濟竊恐待哺者  
眾所發不足供所需卽官權輕無以督率羣吏請別遣重  
臣增給銀穀以往其稅糧物料仍乞例外蠲免以蘇民困

帝可其奏

三編

嘉靖元年七月己酉以南畿浙江江西湖廣四川旱詔撫

按官講求荒政

本紀

二年七月南畿大水吏部侍郎何孟春奏卹災八事曰禁奢靡曰慎賞罰曰減百官俸薪阜隸曰革冗費曰廣聽納曰安撫江淮百姓曰不許鄰近州縣遏糶曰免來歲被災州縣稅糧帝命文武官俸如故餘悉從之

三編

十一月庚寅大學士楊廷和等以直隸江北水災懇常疏請集議振救並蠲一應歲派及額辦錢糧上曰仍當議所以振救之法戶部集廷臣條陳救荒八事又言江北傷重

振之非二十萬不可請將淮揚折糧及運司餘鹽銀兩分  
派振濟從之復命南京兵部侍郎席書兼左僉都御史振

濟江北地方

實錄

四年五月甲戌賜廬州知府龍誥官秩詔天下倣誥備荒

振濟法

本紀

河南歲大饑巡撫潘塤駁諸請振文牒候勘實乃發河南  
知府范鏹不待報輒開倉振之全活十餘萬

范鏹傳

八年二月河南襄陽大饑巡按湖廣御史張祿繪圖以獻  
帝憫之詔有司亟振時廣東僉事林希元上言救荒有二  
難三便六急三權六禁三戒因輯爲書以上詔有司舉行

三編

十七年席書疏言臣考求荒政於古多有礙於今惟作粥一法不須審戶不須防奸但赴局者一體給粥振濟大約大縣設粥十六處中縣減三之一小縣減十之五設粥分廠約日並舉計自十一月起至麥熟爲止四個半月爲率此法非但宜於兩畿并可推於天下

農政全書

十八年九月河南大饑命侍郎王杲往振杲請發帑金詔發臨清倉銀五萬兩以行旣至復請增發銀十五萬兩全活不可勝計

王杲傳

二十三年七月戶部言天下災傷過半而太倉積貯糧米

有餘請將今年糧米四百萬石徵本色七折色三分以  
甦民困其被災之地行令撫按官動支贖罪銀給振從之

三編

二十四年二月帝諭戶工二部曰今歲以來天時少順若  
有水旱之慮所應振卹諸務亟行撫按及各鎮總兵官加  
意幹理又詔曰近來水旱災傷皆由官不得人甚或貪殘

殃民致干和氣如有貪酷害民者撫按官具奏處治

同上

徐九思爲句容知縣歲祲穀湧貴巡撫發倉穀數百石使  
平價糶而償直於官九思曰彼糶者皆豪也貧民雖平價  
不能糶乃以時價糶其半還直於官而以餘穀煮粥食餓

者穀多則使稱力分負以去其山谷遠者則就旁富人穀而官爲償之全活甚衆嘗曰卽天子布大惠安能人人蠲租賜復第在吾曹酌緩急而已

徐九思傳

三十一年二月宣大二鎮大饑人相食兵部請量借軍餉銀振之帝切責本鎮守臣不先入告令各自陳狀命督餉侍郎馬坤馳往經理振濟事宜仍發庫銀二十萬給之坤臨行奏請增給錢十萬從之

三十二年十月吏部侍郎程文德上言今直隸河南山東徐邳淮揚等處方數千里水災異常民不聊生流離載道言官陳振卹未見旦夕亟行臣聞救荒莫便乎其人莫不



便乎拘以常格請於兩直隸二省各遣行人齎詔諭宣布德意慰拊顛連令各州縣自爲振給聽其便宜處置凡官帑官廩贖納勸借苟可以濟民者一不限制又近日戶部申明開納事例亦暫許本地上納隨其所有粟黍麥菽之積可救饑者皆得輸官計直視其合例者官爲請部劄而授之仍令守令造冊登記全活之數定爲等則以課殿最疏入下部議行

三十八年遼東饑巡撫侯汝諒言臣被命入境見其巷無炊烟野多暴骨蕭條慘楚問之則云去年凶饉斗米至銀八錢母棄生兒父食死子父老相傳咸謂百年來未有之

災於時布種入土遺民盼盼方望有秋乃夏秋之交淫雨  
田蟲交作今西成在候斗米猶至七錢冬春不知作何狀  
矣乞大出內帑金錢以拯阡危疏入詔戶部卽發太倉銀  
六萬兩差御史一員亟往召糴設法轉運歲終仍給發牛  
具銀五萬兩以備來春布種

已上三編

萬厯八年戶部言有司積穀振荒先年立法俱止貽州縣  
不知各府爲州縣表率亦當照例存積以備振濟從之  
十七年六月南畿浙江大旱大湖水涸發帑金八十萬振  
之

本紀

二十三年湖廣巡按徐兆魁以地方災傷具四事上請一

議改折一議緩徵一議蠲免一議振濟戶部議緩徵徒貽  
小民他日之累不若勘被災輕重量爲蠲振詔如部議

編三

御史翟鳳翀請所在建常平倉括贖緩節公費易粟備荒

帝善其議

本傳

三十七年各省皆報災傷重大詔戶部借馬價二十五萬  
并工部稅銀十五萬解給各鎮支用其北直山東河南山  
西陝西福建四川常年徵在官聽解內帑稅銀惟留以二  
分解部充軍餉一分振饑民

編三

崇禎間應天府丞張瑋以四方大旱軍食可虞奏請禁江  
西湖廣邊糶而令應天常鎮淮揚五郡折輸漕糧銀赴彼

易米則小民免催科之苦太倉無顆粒之虧他十庫所收銅錫顏料皮布非州縣土產者悉改折色且盡改民解爲官解以救民湯火所司多議行

張瑋傳

### 加派

正德九年十二月營乾清宮加天下賦百萬

三編

嘉靖三十年京邊歲用至五百九十五萬戶部尙書孫應奎乃議於南畿浙江等州縣增賦百二十萬加派於是始

食貨志

東南被倭南畿浙閩多額外提編江南至四十萬提編者加派之別名也其法以銀力差排編十里爲一甲不足則

日會彙編卷三十四  
三  
提下甲補之故謂之提編上同

萬厯四十六年九月戶部以遼餉缺乏援征倭征播例請加派直省正賦惟貴州地磽有苗變不派其浙江十二省南北直隸照會計錄所定田畝七百餘萬頃每畝加三釐五毫共派額銀二百萬三十一兩有奇

四十七年十二月再加天下田賦於舊加外復加三釐五毫增二百萬有奇

四十八年三月復加天下田賦畝再加二釐連前二次加派共增九釐賦五百二十萬遂爲歲額所不加者畿內八府及貴州而已

崇禎三年十二月兵部尙書梁田棟請增田賦下戶部議請畝加九釐之外再增三釐於是增百六十五萬有奇合舊所增凡六百八十餘萬天下益耗矣

已上三編

八年總督盧象昇請加宦戶田賦十之一民糧十兩以上同之旣而概徵每兩一錢名曰助餉

食貨志

十年三月楊嗣昌督師請行因糧法因舊額量加畝輸六合折銀八錢歲得銀百九十二萬九千有奇帝改因糧爲均輸

三編

十二年六月嗣昌復請於勦餉外加徵練餉七百三十萬御史郝晉言萬厯末年合九邊餉止二百八十萬今加派

明倫彙編 家範典 第三十四卷  
遼餉至九百萬剿餉三百三十萬業已停罷旋加練餉七百三十餘萬自古有一年而括二千萬以輸京師又括京師二千萬以輸邊者乎疏語雖切直而時勢危急不能從也

食貨志

### 力役

洪武元年二月乙丑命中書省定役法於是省臣議田一頃出丁夫一人不及頃者以他田足之名曰均工夫每歲農隙赴京供役三十日遣歸田多丁少者以佃人充夫而田主出米一石資其用非佃人而計畝出夫者畝資米二升五合又諭省臣曰民力有限而徭役無窮自今凡有興

作不獲已者暫借民力至於不急之務浮泛之役宜悉罷

之照代典則

十三年帝以徭役不均命戶部尙書范敏編造黃冊敏議

百一十戶爲里丁多者十人爲里長鳩一里之事以供歲

役十年一周餘百戶爲十甲後遂仍其制不廢

范敏傳

十七年令各處賦役必驗丁糧多寡以均其力

會典

十八年令有司第民戶上中下三等爲賦役冊凡遇徭役

取驗以革吏弊

同上

二十六年定各處三等八戶仍開軍民竈匠等籍除排年

里甲依次充當外其大小雜泛差役各照所分上中下三



等入戶點差

世法錄

宣德八年三月李信主言自江淮達京師沿河郡縣悉令軍民輓舟若無衛軍則民夫盡出有司州縣歲發二三千人晝夜以俟而上官又不分別雜泛差役一體派及致土田荒蕪民無蓄積稍遇歉歲輒老穉相屬緣道乞食實可憫傷請自儀真抵通州盡免其雜徭俾得盡力農田兼供夫役從之

李信主傳

正統五年令各府州縣每歲查見在人戶凡有糧而產去

及有丁而家貧者爲貧難戶止聽輕役

王圻通考

葉宗人爲錢塘知縣縣爲浙江省會徭重豪有力往往構

黠吏得財役貧民宗人令民自占甲乙書於冊以次簽差

役乃均

葉宗人傳

景泰元年令里長戶下空間人丁與甲首戶下人丁一體

當差若隱占者許甲首首告

世法錄

成化十五年令各處差徭戶分九等門分三甲務因上司

所派定民輪納

會典

東鹿徭役不均知縣盛頤爲立九則法繼者莫能易成化

十九年巡撫山東又推行九則法於諸府民甚德之

楊瑄傳

孔鏞知都昌縣分戶九等以定役

孔鏞傳

朱英爲廣東參議立均徭法十歲一更民稱便後歷福建

陝西左右布政使皆推行均徭法

朱英傳

正德中歐陽鐸爲福州知府議均徭曰郡多士大夫其士大夫又多田產民有產者無幾耳而役則盡責之民請分民半役士大夫率不便巡按御史汪珊力持之議乃行陽

鐸傳

凡均徭解戶上供爲京繇主納爲中官留難不易中納往復改貿率至傾產且役民自里中正辦外如糧長解戶名色甚繁因事編僉歲有增益嘉隆後行一條鞭法通計一省丁糧均派一省徭役於是均徭里甲與兩稅爲一小民得無擾而事亦易集然糧長里長名罷實存諸役卒至復

僉農氓條鞭法行十餘年規制漸紊不能盡遵也

食貨志

龐嵩攝應天府尹留都民苦役重力爲調劑凡優免戶及寄居客戶詭稱官戶寄莊戶女戶神帛堂匠戶俾悉出以供役民困大蘇

龐嵩傳

嘉靖十五年令今後審編徭役務查照律例申明禁約分爲三等九則隨其丁產量差輕重務使貧富適均毋致偏累違者問罪

十七年令遼東各衛所徭役照腹裏地方五年一次審編四十四年議准江南行十段錦冊法總計十甲之田派爲定則如一甲有餘則留二三甲用不足卽提二甲補之鄉

宦免田十年之內止免一年一年之內止於本戶寄莊田畝已經原籍優免者不許再免

隆慶四年題准江西府州縣各項差役逐一較量輕重照依丁糧編派立限徵收有丁無糧者爲下戶仍納丁銀有丁有糧者爲中戶及丁多糧少與丁糧俱多者爲上戶俱照丁糧併納著爲定例

已上世法錄

崇禎三年河南巡撫范景文言民所患苦莫如差役錢糧有收戶解戶驛遞有馬戶供應有行戶皆僉有力之家充之名曰大戶究之所僉非富民中人之產輒爲之傾自變爲條鞭法以境內之役均於境內之民宜少甦矣乃民間

仍歲奔走罄資津帖是條鞭行而大戶未嘗革也

食貨志

明會要卷五十四終